

ELKI 2015

Fröhlich, neugierig, läbhaft, ufgregt, muetig, geduldig, mängisch o chlie ungeduldig, bitzi schüch u ängstlech, aber vorauem ganz härzig u lieb sí üsí Ching im Elkiturne. Wie jedes Jahr begleitet üs äs Thema dür dTurnstunde düre. Afangs Jahr heimer mit 25 Ching u Begleitig ds Alphabet kenneglehrt u abem Summer bereise mir mit 14 Ching jedi Wuche äs Land.

Damit sech dMamis ruhiger zäme chöi ungerhaute, símer im Januar amene Obe bimene gmüetleche Znachtässe im Restaurant Vorstedtlí zAegerte zämeghocket u hei üs nöcher kenneglehrt.

Bí üsne zwöi VAKI-Turne amene Samstigmorge heimer bim einte dFührwehr gnauer agluegt u bim Zwöite aus Bouarbeiter uf dr Bousteu fliessig gschaffet. Nachem Turne heimer jewiels äs Apéro mit dr ganze Familie gnosse u hei so dMüglichkeit gha, sech o chlie besser kennezlehre.

Spezielleri Stunde heimer einersiets vor de Ostere bí üsere Abschlussstung und bí üsere Wiehnachtsstung womer nachem Turne jewiels gmüetlech düe zmörgele.

Am Soirée heimer üses Taktgfüeu ir Minidisco dörfe unger Bewies steue u dChing hei wäuz freud gha uf dr Bühni dörfe ztanze.

Möcht mí a dere Steu bí míre Leiterkollegín Corinne ganz härzlech bedanke. Die letschte 4 Jahr mit ihre zämezschaffe het sehr guet klappet u hei wunderschöni Momänte dörfe zäme erläbe. D Corinne het sech entschiende ihres Amt abzgä. Vo Härze wünschí Dír u DÍre Familie aues Liebe. Uf dZämearbeit mit dr Nachfougerín Denise Bissig freu íg mí natürlech sehr u bímer sícher, dass mír super schöni Momänte wärde erläbe!

Äs wieters MERCI geit a Vorstand für die finanzielli Ungerstützig, vorauem bí de zMorgeässe und de chliene Gschänkli wo bí de Ching immer sehr guet achöme. Denn míre Familie, wo mír dZiet u dr Freirum gít um füre Vereín dörfe mitzwürke.

Wünsche mír vo Härze, dass es üsem Vereín wieterhín so guet geit u mír Auí í die glicheí Richtig düe stüre. Euch liebí Turnkollegínne und eune Familiene gueti Gsundheit u aues Liebe für dZuekunft.

Härzlechí Grüess, Bianca Burckhardt